



CYDWEITHREDFA GWELLA GWASANAETHAU  
GOFAL A LLESANT **GOGLEDD CYMRU**  
**NORTH WALES SOCIAL CARE AND WELL-BEING**  
SERVICES IMPROVEMENT COLLABORATIVE

15 Medi 2017

Rebecca Evans AC  
Gweinidog Iechyd y Cyhoedd a Gwasanaethau Cymdeithasol  
Llywodraeth Cymru  
Bae Caerdydd  
Caerdydd  
CF99 1NA

Annwyl Weinidog,

Diolch am eich llythyr dyddiedig 2 Awst 2017 ac rwy'n falch o ddarparu gwybodaeth i chi o ran Bwrdd Partneriaeth Rhanbarthol Gogledd Cymru.

Fel Cadeirydd Bwrdd Partneriaeth Rhanbarthol Gogledd Cymru rwy'n hynod o falch gyda'r cynnydd mae partneriaid ar draws y rhanbarth yn ei wneud gyda datblygiad trefniadau cyllidebau cyfun a chomisiynu. Mae datblygiad y Cytundeb Integreiddio Rhanbarthol yn garreg filltir sylweddol i'r rhanbarth o ran dangos eu hymrwymiad i gydweithio yn y dyfodol. O ystyried maint daearyddol a natur Gogledd Cymru a'r nifer o bartneriaid sy'n rhan o hyn, rydym yn ofalus o beidio colli golwg o beth sy'n bwysig i'n poblogaeth ar lefel leol; sydd yn unol â chanfyddiadau cychwynol yr adolygiad Seneddol o Iechyd a Gofal Cymdeithasol yng Nghymru. Fel Bwrdd rydym yn herio ein hunain yn gyson i wirio bod ein camau gweithredu a'n bwriadau ar gyfer y dyfodol yn cael effaith gadarnhaol ar ein poblogaeth.

I'r perwyl hwn, mae ein cyflawniadau hyd yma yn unol â'n taith o integreiddio fel partneriaid. Rydym yn credu y gall cyllidebau cyfun fod yn rhan allweddol o ddull system gyfan o drin iechyd a gofal cymdeithasol ond rhaid iddo gael ei wneud ar y cam iawn yn natblygiad gwasanaethau integredig. Mae ein timau integredig yn lleol iawn o ran natur ac un her sydd gennym fel Bwrdd yw deall sut gall gwasanaethau integredig lleol o'r fath weithio'n effeithiol gyda chyllideb gyfun ranbarthol. Mae'n debygol ar gyfer y rhan hon o'n taith, y byddai trefniadau lleol neu isranbarthol ar gyfer cyfuno cyllid yn fwy effeithiol.

Y dull rydym wedi cytuno arno yw adeiladu ar y cydweithredu rhagorol sy'n digwydd yn y rhanbarth a pheilota amrywiaeth o wahanol fodelau a fydd yn profi'r egwyddorion a'r trefniadau ar gyfer cyllidebau cyfun fel a restrir isod.

## Grŵp Cyllidebau Cyfun Rhanbarthol

Rydym wedi sefydlu grŵp Cyllidebau Cyfun rhanbarthol; mae hwn yn grŵp technegol/arbenigol a chaiff ei Gadeirio gan Nicola Stubbins, Cyfarwyddwr Gwasanaethau Cymdeithasol. Mae cynrychiolwyr ar y grŵp hwnnw yn cynnwys swyddogion cyfreithiol, arbenigedd AD, Swyddogion Cyllid Adran 151 yn ogystal â swyddogion o'r gwasanaethau gofal cymdeithasol ac iechyd. Mae'r grŵp cyllidebau cyfun hwn wedi bod yn cydweithio i ddeall natur ac amrywiaeth trefniadau cyllidebau cyfun ac mae'n glir bod cyllidebau cyfun yn ffordd weinyddol o gefnogi canlyniad neu amcan a ddymunir a'u bod yn fodd o gyrraedd nod, yn hytrach na'r nod ei hun. Mae'n cydnabod y gall cyfuno cyllidebau fod yn rhwystr sylweddol i integreiddio llwyddiannus neu arafu cyflymder gweithredu. Mae hefyd wedi dod i'r casgliad nad oes tystiolaeth i awgrymu y bydd cyfuno cyllidebau ar ei ben ei hun yn mynd i'r afael â'r pwysau ariannol sylweddol a'r heriau demograffig sy'n wynebu gwasanaethau gofal cymdeithasol ac iechyd. Gall cyllidebau cyfun alluogi integreiddio, fodd bynnag, dim ond un cam ar y daith integreiddio yw hyn.

Mae'r grŵp cyllidebau cyfun hefyd wedi nodi risgiau a materion bydd angen i bartneriaid roi sylw manwl iddynt cyn mynd i mewn i gytundeb cyllidebau cyfun:

- Trin gorwariant/tanwariant cyllideb
- Buddion a geir gan un partner ar draul partner arall
- Colli neu gollu canfyddedig o ran atebolrwydd dros gyllidebau
- Cymhorthdal ar draws gwasanaethau ar draws ffiniau awdurdodau lleol
- Gweithredu toriadau cyllideb neu dwf gwasanaethau
- Canolbwyntio ar bwy wnaeth ariannu beth, yn hytrach na chanlyniadau
- Trefnau TAW gwahanol (yn gyffredinol mae awdurdodau lleol yn codi ac adennill TAW ond nid yw'r GIG yn gwneud hyn)
- Trefnau cyllido a chodi tâl gwahanol
- Diffyg ystyriaeth i effaith ar wasanaethau corfforaethol, e.e. cyllid a/neu lywodraethu i reoli cyllid cyfun
- Atebolrwydd a chostau yswiriant
- Trefniadau a chostau archwilio
- Trefniadau pensiwn
- Costau etifeddiaeth os bydd y cytundeb yn datod
- Pwysau anrhagweledig ar y system, e.e. newidiadau gwleidyddol lleol yn y cyngor, rheidrwydd gwleidyddol cenedlaethol yn y GIG
- Newid arweinyddiaeth yn y bartneriaeth
- Diffyg aliniad rhwng diwylliant a gwerthoedd

Mae Swyddogion Cyllid Adran 151 yr Awdurdodau Lleol sydd ar y cyfarfod cyllidebau cyfun rhanbarthol wedi cyfarfod gyda Swyddfa Archwilio Cymru i drafod goblygiadau archwilio sy'n ymwneud â chyllidebau cyfun a chaiff trafodaethau pellach eu trefnu. Hoffem dynnu eich sylw i adroddiad dyddiedig 8 Chwefror 2017 gan y Swyddfa Archwilio Genedlaethol – "Health and Social Care Integration" – yr Adran Iechyd a'r Adran Cymunedau a Llywodraeth Leol a GIG Lloegr sy'n amlygu profiadau integreiddio a chyllidebau cyfun yn Lloegr ac, fel rhanbarth, rydym yn awyddus i ddysgu o'r profiadau hyn i sicrhau bod unrhyw gyllidebau

cyfun ar draws Gogledd Cymru yn llwyddiannus. Mae'r cwestiynau a godir yn y Papur Gwyn "Diwygio Llywodraeth Leol: Cadernid ac Adnewyddiad" dyddiedig 31 Ionawr 2007 yn codi set o gwestiynau am natur, heriau a chyfleoedd gweithio rhanbarthol ac mae'r rhain yn gwestiynau yr un mor berthnasol i'w codi wrth roi ystyriaeth i gyllidebau cyfun. I'r perwyl hwn, rydym wedi datblygu templed arfarniad opsiynau (Atodiad 1) y bydd partneriaid yn ei ddefnyddio wrth integreiddio gwasanaethau ac ystyried cyfuno cyllidebau. Mae Bwrdd Partneriaeth Rhanbarthol Gogledd Cymru wedi cymeradwyo'r templed arfarnu opsiynau hwn i'w ddefnyddio gan bartneriaid wrth roi ystyriaeth i integreiddio a chyfuno cyllidebau.

Oherwydd ffactorau a nodir uchod, mae'r Bwrdd yn cymryd dull gochelgar a gofalus i gyfuno cyllidebau ac mae'n glir bod datblygiad cyllidebau cyfun yn cael ei arwain gan arweinwyr gofal cymdeithasol ac iechyd yn hytrach na chael ei arwain gan gyllid.

### Cytundeb Integreiddio Rhanbarthol

Ym mis Mehefin 2017 gwnaeth Bwrdd Partneriaeth Rhanbarthol Gogledd Cymru gymeradwyo datblygiad Cytundeb Integreiddio Rhanbarthol. Mae hwn yn gytundeb trosfwaol y mae pob partner yn cytuno iddo sy'n cofnodi'r sail y bydd y partneriaid yn cydweithredu â'i gilydd arno ac mae'n nodi:

- Y prif amcanion
- Egwyddorion cydweithredu
- Strwythurau llywodraethu mae'r partïon wedi eu rhoi ar waith (adrodd i Fwrdd Partneriaeth Rhanbarthol Gogledd Cymru)
- Rolau a chyfrifoldebau'r partïon

Bydd unrhyw drefniant cyllideb gyfun a ddatblygir ar draws Gogledd Cymru p'un a yw'n rhanbarthol neu isranbarthol o ran natur yn eistedd fel atodlen i'r cytundeb trosfwaol hwn. Mae'r dull hwn yn darparu hyblygrwydd i gytundebau Adran 33 presennol gael eu dwyn dan y cytundeb hwn. Mae Bwrdd Partneriaeth Rhanbarthol Gogledd Cymru wedi cymeradwyo'r Cytundeb Integreiddio Rhanbarthol a ddatblygwyd ac rydym yn falch o adrodd bydd hyn yn datblygu drwy strwythurau gwleidyddol/llywodraethu partneriaid i gael ei lofnodi. Mae hyn yn ddatblygiad a chyflawniad sylweddol i Fwrdd Partneriaeth Rhanbarthol Gogledd Cymru.

Er ein bod yn cymryd dull gofalus o ran cyfuno cyllidebau fel rhanbarth, gan sicrhau eu bod yn cael eu sbarduno gan wasanaethau a dilyn taith integreiddio yn naturiol, rydym wedi bod yn datblygu meysydd peilot ar gyfer cyfuno cyllidebau:

### Cronfa Gofal Integredig

Mae cytundeb partneriaeth drafft wedi'i ddatblygu ar gyfer y Gronfa Gofal Integredig. Mae'r dull hwn yn unol â pharagraff 62 yn y Canllawiau Statudol Rhan 9 a Chanllawiau'r Gronfa Gofal Integredig. Mae'r dull hwn wedi'i gymeradwyo gan Fwrdd Partneriaeth Rhanbarthol Gogledd Cymru a byddwn yn symud ymlaen i gwblhau'r cytundeb hwn a'i lofnodi.

### Grant Cyllid Trawsnewidiol Gofalwyr

Mae cytundeb partneriaeth drafft wedi'i ddatblygu, eto mae'r dull hwn yn unol â pharagraff 62 yn y Canllawiau Statudol Rhan 9, wrth aros am drafodaethau pellach gyda'r Bwrdd Iechyd, gwnaeth Bwrdd Partneriaeth Rhanbarthol Gogledd Cymru gymeradwyo'r dull hwn a bydd y cytundeb yn cael ei gwblhau i'w lofnodi.

### Gwasanaethau Integredig Cymorth i Deuluoedd (IFSS)

Fel rhanbarth, mae'r gwasanaeth IFSS wedi'i sefydlu yng Ngogledd Cymru. Mae trefniadau partneriaeth isranbarthol a sefydlwyd pan ddaeth yr IFSS i fodolaeth. Oherwydd natur gynnil iawn y gwasanaeth IFSS, mae Bwrdd Partneriaeth Rhanbarthol Gogledd Cymru wedi cymeradwyo bod y dull isranbarthol presennol yn cael ei gynnal, fodd bynnag, gellir ei adolygu yn ddiweddarach pan geir eglurder oddi wrth Lywodraeth Cymru o ran a yw'n ofyniad bod ag un gronfa ranbarthol. Nodir, fodd bynnag, na fydd creu un gyllideb gyfun ranbarthol ar gyfer IFSS yn dod ag unrhyw werth ychwanegol i'r gwasanaeth ac ni fydd yn dod ag unrhyw ganlyniadau pellach i'r rhai sy'n cael y gwasanaeth.

### Gwasanaethau Cymunedol – Ffordd Gwynedd

Bydd Cyngor Gwynedd a'r Bwrdd Iechyd yn peilota cyllideb gyfun yn ardal Tywyn y Sir. Mae'r ardal yn cynnwys pedair adran etholiadol a bydd yn cynnwys y darpariaethau a ganlyn – 1 Ysbyty Cymunedol; 2 Cartrefi Nyrsio; 3 Cartrefi Preswyl Preifat ac un Cartref Preswyl sy'n eiddo i'r Awdurdod Lleol. Mae datblygiadau presennol yn cynnwys casglu a gwirio data ac mae grŵp gweithredol lleol wedi'i sefydlu i symud y datblygiad hwn yn ei flaen. Mae Bwrdd Partneriaeth Rhanbarthol Gogledd Cymru wedi cymeradwyo cynnig y bydd y gyllideb gyfun beilot hon yn datblygu ac adrodd yn ôl i Fwrdd Partneriaeth Rhanbarthol Gogledd Cymru ymhen 6 mis oherwydd bydd hyn yn darparu dysgu gwerthfawr i'r rhanbarth drwy ddatblygu cyllideb gyfun mewn ardal gynnil lle mae'r daith integreiddio eisoes wedi datblygu yn sylweddol.

### Capasiti Cartrefi Gofal Sir y Fflint

Fel sir, mae gan Sir y Fflint flaenoriaeth glir i gryfhau'r sector cartrefi gofal oherwydd pwysau cenedlaethol a lleol. Mae Cyngor Sir y Fflint a'r Bwrdd Iechyd wedi cytuno i gydweithio i ddatblygu dull ar y cyd gyda chyllideb gyfun i gynyddu capasiti cartrefi gofal yn ardal de Sir y Fflint. Bydd y dull arloesol hwn yn cryfhau capasiti cartrefi gofal mewnol a chapasiti gofal canolraddol sy'n cefnogi'r 3 phrif ysbyty sy'n gwasanaethu Sir y Fflint ac yn enwedig Ysbyty Maelor Wrecsam. Bydd hyn yn cynnwys cyfuno cyllidebau cyfalaf a refeniw i gynyddu darpariaeth gofal o safon a lleihau pwysau yn y system iechyd a gofal cymdeithasol. Gwnaeth Bwrdd Partneriaeth Rhanbarthol Gogledd Cymru gymeradwyo bod y peilot hwn yn datblygu a bod cynnydd yn cael ei adrodd ymhen 6 mis oherwydd eto, bydd hyn yn ddysgu gwerthfawr i'r rhanbarth.

## Lleoliadau cartref gofal adran 117

Cafwyd cynnig gan y Bwrdd Iechyd i beilota cyfuno cyllidebau ar gyfer lleoliadau cartref gofal Adran 117 ac mae Cyngor Bwrdeistref Sirol Conwy wedi cytuno i weithio gyda'r Bwrdd Iechyd ar hyn. Wrth aros am eglurder gan y Bwrdd Iechyd ar y peilot hwn, mae Bwrdd Partneriaeth Rhanbarthol Gogledd Cymru wedi cymeradwyo ei ddechrau gydag adroddiad pellach ar gynnydd ymhen 6 mis.

## Plant gydag anghenion cymhleth

Mae hwn yn faes blaenoriaeth ar gyfer integreiddio yn y Ddeddf ac ar gyfer Bwrdd Partneriaeth Rhanbarthol Gogledd Cymru. Caiff rhagor o waith ei wneud gan is-grŵp Bwrdd Partneriaeth Rhanbarthol Gogledd Cymru i nodi meysydd integreiddio a allai arwain at gyllideb gyfun yn y dyfodol.

Byddwch yn ymwybodol, yn ogystal â chyfuno cyllidebau, mae Rhan 9 y Ddeddf yn gofyn i ni fel rhanbarth gynnal nifer o weithgareddau eraill sy'n ymwneud â chomisiynu. I roi darlun llawn i chi o'r gwaith yn y rhanbarth, rwyf wedi cymryd y cyfle i roi trosolwg i chi o sut rydym yn datblygu yn erbyn y gofynion:

## **Comisiynu Rhanbarthol**

Bydd Llywodraeth Cymru yn ymwybodol bod gan bartneriaid yng Ngogledd Cymru hanes hirsefydlog o gydweithio i gomisiynu gwasanaethau; fel rhanbarth, yn 2012, gwnaethom sefydlu canolfan gomisiynu rhanbarthol a ariannwyd gan y 6 Awdurdod Lleol a'r Bwrdd Iechyd. Cylch gwaith y ganolfan oedd comisiynu a chanfod lleoliadau cost uchel, maint isel i bartneriaid. Roedd hyn yn cynnwys datblygu fframweithiau ar gyfer lleoliadau preswyl i blant ac oedolion. Cynhaliwyd adolygiad annibynnol o'r model hwn yn 2014 ac arweiniodd hyn at ail-lunio natur y gwaith comisiynu sy'n cael ei wneud yn rhanbarthol, eto wedi'i ariannu gan y 7 partner. Mae'r pwyslais ers hyn wedi bod ar gomisiynu strategol ac mae gwaith sylweddol yn digwydd yn rhanbarthol o gwmpas cartrefi gofal a chomisiynu gofal cartref ar draws y partneriaid. Fel rhanbarth, rydym wedi arwain ar nifer o fentrau cenedlaethol ar ran y Bwrdd Comisiynu Cenedlaethol, er enghraifft, y dadansoddiad marchnad cartrefi gofal a gafodd ei gyflwyno wedyn ar draws gweddill Cymru. Fel partneriaid, rydym yn credu bod buddion mwy i'w cyflawni drwy gomisiynu integredig neu gomisiynu ar y cyd a dulliau rhanbarthol cyffredin a ddarperir yn lleol, nag y byddem yn eu cyflawni drwy gyfuno cyllidebau ar hyn o bryd. Bydd y gwaith rydym yn ei wneud dan ein trefniadau Partneriaeth Comisiynu Strategol ar draws partneriaid yn dod â chanlyniadau gwell sylweddol i ddinasyddion mewn marchnad wedi'i chomisiynu sy'n gynaliadwy ac addas i'r diben.

## **Cynnal asesiad anghenion poblogaeth a dadansoddiad o'r farchnad gan gynnwys anghenion hunan-arianwyr**

Fel rhanbarth, gwnaeth partneriaid Gogledd Cymru gwblhau a chyhoeddi eu Hasesiad Anghenion Poblogaeth ar 30 Mawrth 2017 fel oedd yn ofynnol. Mae'r Asesiad ar gael mewn amrywiaeth o fformatau a gellir ei weld drwy [www.cydweithredfagogleddcymru.cymru](http://www.cydweithredfagogleddcymru.cymru).

Mae gwaith yn mynd rhagddo bellach gyda phartneriaid i gwblhau ein Cynllun Ardal ac rydym yn ymgynghori ar y cynllun drafft ar hyn o bryd.

Fel rhanbarth, gwnaeth Gogledd Cymru beilota creu a chwblhau'r Dadansoddiad Marchnad Cartrefi Gofal, gan gydweithio gyda'r Bwrdd Comisiynu Cenedlaethol ar y peilot hwn.

### **Cytuno ar ddatganiad sefyllfa'r farchnad integredig a strategaeth comisiynu**

Fel rhanbarth rydym wedi bod yn gweithio ar y cyd drwy ein Bwrdd Comisiynu Rhanbarthol ar ddatblygiad ein "Datganiad sefyllfa'r farchnad/Datganiad Llunio'r Farchnad Cartrefi Gofal". Mae gennym ddatganiad drafft aeddfed wedi'i gwblhau a gaiff ei gwblhau a'i gymeradwyo gan bartneriaid erbyn diwedd y flwyddyn. Mae'r Datganiad Sefyllfa'r Farchnad hwn yn cynnwys gwybodaeth ar gyfer pob partner o ran eu bwriad comisiynu, felly nid oes angen strategaeth gomisiynu ar wahân.

### **Cytuno ar gontract a manyleb cyffredin**

Fel rhanbarth mae Gogledd Cymru wedi datblygu cytundeb cyn-lleoliad rhanbarthol ar gyfer cartrefi gofal. Mae hwn yn gytundeb tair ffordd rhwng yr Awdurdod Lleol, y Bwrdd Iechyd a Darparwyr. Mae'r dull hwn wedi bodoli ers peth amser. Mae pryder yn dod i'r amlwg fodd bynnag, bod y Bwrdd Iechyd yn cael gwybod am yr angen iddynt dendro am ddarpariaeth Cartrefi Gofal gan eu bod yn gweithio y tu allan i'w rheoliadau ariannol/caffael a ganiateir ar hyn o bryd. Os bydd y Bwrdd Iechyd yn parhau i dendro, bydd hyn yn arwain at dynnu o'r contract cyffredin presennol. Bydd angen trafodaethau pellach ar draws partneriaid o ran y cyfeiriad hwn.

### **Dull integredig o gytuno ar ffioedd gyda darparwyr**

Mae Awdurdodau Lleol Gogledd Cymru wedi gweithio ar y cyd ers nifer o flynyddoedd o ran ffioedd gofal. Mae gennym fethodoleg a ddefnyddir gan y 6 Awdurdod Lleol fodd bynnag, oherwydd gwanhaol rymoedd y farchnad, darpariaeth cartrefi gofal ar draws y rhanbarth a ffactorau lleol fel lefelau staffio, natur marchnad y darparwr a fforddiadwyedd, nid yw'n bosibl cytuno ar un ffi gofal rhanbarthol ar draws y rhanbarth.

O ran Gofal Iechyd Parhaus, mae'r Bwrdd Iechyd yn gweithio ar ddatblygu methodoleg ffioedd ar gyfer cytuno ar y gyfradd Gofal Iechyd Parhaus ar gyfer cartrefi Gofal sydd wedi'i alinio i angen clinigol y boblogaeth hon a'r gwasanaeth sy'n ofynnol i ddiwallu anghenion

unigolion. Ni fydd y ffi hon yn y dyfodol wedi'i halinio i'r fethodoleg gosod ffioedd rhanbarthol a ddefnyddir gan Awdurdodau Lleol. Yn dilyn dyfarniad diweddar y goruchaf lys, bydd y gyfradd Gofal Nyrsio a Ariennir yn destun adolygiad blynyddol a chaiff dull cenedlaethol ei fabwysiadu i osod y gyfradd.

### Dull integredig i sicrhau ansawdd

Fel rhanbarth, mae partneriaid yn cydweithio i gynnal adroddiad sicrhau ansawdd cartrefi misol. Mae'r adroddiad hwn yn darparu gwybodaeth am gartrefi o ran pryderon ansawdd. Mae'r adroddiad hwn yn cofnodi gwybodaeth am ddwysau pryderon sy'n cynyddu neu sy'n ffurfiol, themâu allweddol a beth rydym yn ei wneud ar y cyd i ymateb i'r rhain. Mae hyn hefyd yn casglu gwybodaeth am gapasiti gwelyau; cofnodi cynnydd neu leihad dros amser o ran gwelyau cofrestredig.

Mewn dwy ardal Awdurdod Lleol rydym yn peilota adnodd monitro ansawdd yn seiliedig ar y fframwaith canlyniadau cenedlaethol a chyfwerth ar gyfer safonau gofal iechyd. Mae hyn hefyd wedi'i rannu ar draws pob un o'r Awdurdodau Lleol yng Ngogledd Cymru. Cynhelir cyfarfod i ystyried gwersi a ddysgwyd ac i edrych ar sut gall yr adnodd ac arfer wella. Rydym yn ceisio fel rhanbarth bod ag un adnodd cynhwysfawr sengl (Adnodd Monitro Ansawdd). Byddai hyn yn cynnwys holiaduron i bobl sy'n cael eu cefnogi a'u teuluoedd, cynrychiolwyr, staff a rheolwyr cartrefi gofal a gweithwyr proffesiynol eraill. Bydd gofyn i gartrefi gofal gwblhau hunanasesiad hefyd.

Yn ogystal, fel rhanbarth rydym wedi adolygu'r gweithdrefnau Dwysau Pryderon a datblygu adnodd rheoli ansawdd, darparu polisi a gweithdrefn beth sy'n bwysig sy'n dechrau o bwynt monitro ac sy'n nodi sut rydym yn ymateb i bryderon ansawdd. Mae'r gwaith hwn wedi'i ddatblygu gan weithio gyda chydweithwyr diogelu a chydweithwyr rheoli contract.

Yn eich llythyr, rydych hefyd yn gofyn i ni gynnwys manylion am sut mae'r rhanbarth yn cynnwys tai yn ei waith. Mae Bwrdd Partneriaeth Rhanbarthol Gogledd Cymru wedi sefydlu cyswllt cadarn gyda'r Pwyllgor Cydweithredol Cefnogi Pobl yn y Gogledd nawr a bydd y Cadeirydd yn mynychu cyfarfodydd Bwrdd Partneriaeth Rhanbarthol Gogledd Cymru bob 6 mis. Mae gan nifer o'r Cyfarwyddwyr Gwasanaethau Cymdeithasol gyfrifoldebau strategol hefyd ar gyfer eu gwasanaethau tai eu hunain ac yn fwy lleol mae partneriaethau tai y mae partneriaid arnynt. Bydd Bwrdd Partneriaeth Rhanbarthol Gogledd Cymru yn ceisio nodi cynrychiolydd rhanbarthol o'r partneriaethau tai neu'r sefydliad ambarél fodd bynnag ar gyfer y Landlordiaid Cymdeithasol Cofrestredig a llunio cyswllt ar sail debyg i'r un ar gyfer Cefnogi Pobl. Bydd hyn yn ogystal â'r cyfraniad tai fel a nodir ar hyn o bryd, a bydd hyn yn digwydd mewn meysydd blaenoriaeth gwaith unigol Bwrdd Partneriaeth Rhanbarthol Gogledd Cymru.

Gobeithiaf fod yr ymateb hwn yn rhoi sicrwydd i chi ein bod ni fel rhanbarth yn datblygu'n dda ar amrywiaeth o drefniadau cydweithredol a phartneriaeth. Yng nghanol popeth rydym yn ei wneud fel Bwrdd mae gwneud gwahaniaeth cadarnhaol i'n poblogaeth yng Ngogledd Cymru. Rwy'n siŵr y byddwch yn cytuno bod y dystiolaeth a gyflwynir yn y llythyr hwn yn dangos hyn ar waith.

Os bydd angen rhagor o wybodaeth arnoch, mae croeso i chi gysylltu â mi a byddaf yn falch o gyfarfod i drafod ymhellach.

Cofion cynnes

Yn ddiffuant



Cynghorydd Gareth Roberts

Cadeirydd Bwrdd Partneriaeth Rhanbarthol Gogledd Cymru

e-bost: [cynghorydd.GarethRoberts@gwynedd.llyw.cymru](mailto:cynghorydd.GarethRoberts@gwynedd.llyw.cymru)

e-bost: [bethan.m.jonesedwards@sirddinbych.gov.uk](mailto:bethan.m.jonesedwards@sirddinbych.gov.uk)

(Pennaeth Cydweithredu Rhanbarthol)